

**TEZAUUR LITURGIC**  
**12 OCTOMBRIE**

**ACATISTUL**  
**SF. IERARH-**  
**MĂRTURISITOR**  
**NICOLAE**  
**MOGHILEVSKI,**  
**MITROPOLITUL**  
**ALMA ATEI ȘI**  
**KAZAHSTANULUI**



**MOSCOVA, 2000**



# **Акафист**

**священноисповеднику Николаю**

**Могилевскому, митрополиту**

**Алма-Атинскому**

## **Кондак 1**

---

Избранный от Предвечнаго Архиерея и Церкви Зиждителя, данный Казахстану ходатаю изрядный и заступниче пречудный, святителю Николае, ублажая подвиги и труды твоя, любве ради Господа тобою подъятыя, восхваляем дивнаго во святых Своих Бога нашего, давшаго тебе благодать величия Своего и научившаго нас любовью пети тебе: Радуйся, святе Николае, Христов исповедниче и Казахстанский чудотворче.

## **Икос 1**

---

Ангелов Творец и человек спасения Совершитель, благоплодную чистоту твою душевную и телесную провидев, избра ты из начала Ангелом и предстоятелем быти Церкви

Казахстанския, да посреде многомятежн्या бури безбожия явит тя веры чистья исповедника непоколебима и добродетелей христианских древо благосеннолиственное, рассеянная чада церковная ко благоутишной пристани Божественная Тройческая любви собирающая. За еже благодарне взываем ти таковая:

Радуйся, Бога Отца Безначального благоговейный служителю. Радуйся, Ипостасного Бога Слова неумолчный провозвестниче. Радуйся, Бога Духа Всесвятого избранное жилище. Радуйся, Живоначальная Троицы носило и похваление. Радуйся, узы и темницы за исповедание Христа восприявый. Радуйся, исповедованием святым соборища нечестивых отлучивыйся. Радуйся, гордыню бесовскую и самочиние во обновленчестве прозревый. Радуйся, то, яко богопротивное хуление отвергший. Радуйся, послушание сыновнее к исповеднику Патриарху Тихону присно хранивый. Радуйся, богозаповеданное единство церковное, яко святыню нерушимо соблюдый. Радуйся, Богомудраго старца Патриарха Сергия собеседниче и сподвижниче. Радуйся, Боголюбезнаго Патриарха Алексия ревностный сослужителю и сотаинниче.

Радуйся, святе Николае, Христов исповедниче и Казахстанский чудотворче.

### **Кондак 2**

---

Видяще тя, блаженне, от матерних пелен Богу возложена и из млада благодати Утешителя Духа Истины взыскующа, прославляем Бога, вся потребная ко спасению и наследию блаженства вечнаго нам подающаго, поя Ему: Аллилуия.

### **Икос 2**

---

Разум свой непрестанно горе к престолу Пресвятыя Троицы вознося, светом истиннаго богопознания душу твою исполнил еси, имже и врученное ти стадо словесных Христовых овец просвещал еси. За еже приими от нас похвалы сия:

Радуйся, в светозарный день Пасхи Христовы, яко сын радости и утешения рожденный. Радуйся, от благочестивых родителей Феодосием, яко Богом данный, нареченный. Радуйся в купели крещения во Христа облеченный. Радуйся, печатью Духа Святаго во святем помазании таинственне запечатленный. Радуйся, благочестием и молитвами родителей в творении заповедей

Господних утвержденных. Радуйся, яко соблюл еси Божественное семя, благонаравием родительским всеянное в сердце твоём. Радуйся, повелением Божиим в Преславную Нилову пустынь вселивыйся, да добродетелей сокровище преобрязеши. Радуйся, имя Николая Чудотворца, яко миро свыше изливанное, во иночестве восприемый. Радуйся, волею твердою воли своея совлекшийся и всего себе воле Божией предавый. Радуйся, совершенным послушанием росю Святаго Духа пламень страстей угасивый. Радуйся, чистотою сердца твоего Сладчайшего Господа Иисуса созерцавый. Радуйся, внутреннею красотою Креста Христова душу твою озаривый.

Радуйся, святе Николае, Христов исповедниче и Казахстанский чудотворче.

### **Кондак 3**

---

Силу, данную ти свыше, к служению апостольскому ты призывающую, в хиротонии у раки цельбоносных мощей Черниговскаго святителя и чудотворца Феодосия сердцем кротким и смиренным восприял еси, радуясь. И Подвигоположника Христа Иисуса без боязни и страха ложнаго чисте в роде сем,

прелюбодейнем и грешнем, исповедал еси, непрестанно воспевая Ему: Аллилуия.

### **Икос 3**

---

Имуще сердце твое, яко добрую почву, к восприятию благаго семене Слова Божия всегда отверстым, вся мира сего красная ни во что же вменив, неуклонно шел еси по стопам Христа, зовуща: аще кто хочет в след Мене идти, да отвержется себе и возьмет крест свой, и в след мене да идет. Сего ради ублажаем тя похвалы сими:

Радуйся, любезная и красная мира сего презревай. Радуйся, небесная и нетленная сокровища вожделевый. Радуйся, тесный путь спасения от юности возлюбивый. Радуйся, силою свыше на подвиг крестоношения облеченный. Радуйся, мучений от нечестивых за исповедание истиннаго Бога не устрашивыйся. Радуйся, жизнь твою за веру отеческую положить не отрекийся. Радуйся, страданий за веру и Церковь, яко сокровища всебогатаго взыскавый. Радуйся, с веселием уготовавыйся к принятию ран за Христа. Радуйся, в разоренной обители Саровской заточения и лишения люта радостне претерпевый. Радуйся, сия, яко

сладостнейшее келейное послушание преподобному Серафиму восприявый. Радуйся, Христа в непосрамленном уповании своем споборствующа себе обретый. Радуйся, венец чистаго исповедничества стяжавый.

Радуйся, святе Николае, Христов исповедниче и Казахстанский чудотворче.

#### **Кондак 4**

---

Буря бесовския ярости, грехов ради и охлаждения христианския любви в роде человеческом, попущением Божиим превеликою силою устремися на Церковь Русскую, да слабоверныя и малодушныя, иже на песце самоугодия воздвигоша храмины душ своих, сокрушит, а иже на недвижимем камени веры и долготерпения духовное строение свое во благочестии, Богу содействующу, созидают подвигнет громогласне в веселии духовнем пети: Аллилуия.

#### **Икос 4**

---

Слыша и видя премногую твою добродетель и непоколебимую верность Святей Церкви, яко злато чистейшее в гонениях лютых возсиявша, многострадальная паства, на безкрайних

Казахстанских просторах, яко на едину от многих Голгоф Святыя Руси возшедшая, со благодарением всеблагому Божию смотрению, тако о ней благоволившему, во умилении и радости едином сердцем и едиными усты среташа ты звании сими:

Радуйся, яко адамант точилом язв и болезней испытанный. Радуйся, яко золото в горниле огненных искушений очищенный. Радуйся, прещений лютых не убоявшийся. Радуйся, и самыя смерти не устрашивыйся. Радуйся, странствия Владычня и бессмертныя трапезы Его приобщивыйся. Радуйся, яко звездо лучезарная, над Казахстанскою странною возсиявый. Радуйся, во вся концы ея свет благодати Божия пролиявый. Радуйся, благий вертоградарю, сад веры благочестивыя во стране сей насадивый. Радуйся, поточе сладости, водою благочестия паству твою напоивый. Радуйся, миром Христовым и богоприятных молитв твоих кадилом просторы Казахстанския облагоухавый. Радуйся, яко Божию изволению последуя, инославныя мусульмане тебе со усердием служаху. Радуйся, яко и ты онем любовию теплою всегда благодеял еси.

Радуйся, святе Николае, Христов исповедниче и Казахстанский чудотворче.

### **Кондак 5**

---

Боготочною кровию, на Кресте излиянною, и тою искупившаго падшее создание Свое от греха, проклятия и вечныя смерти, верою зря волею распеншагося за ны Владыку и Подвигоположника нашего и усердне к Нему любовью горя, всем житием твоим провещал еси: мне, еже жити – Христос, а смерть – приобретение Христа, Ему же непрестанно воспевал еси: Аллилуия.

### **Икос 5**

---

Видевше, в немногих храмах, подобно оазисам в бескрайней безбожия пустыне стоящих, паству твою у источников истиннаго богопочитания и благочестия пьющую воду живу, апостолам Христовым соревнуя, силою Божиею превозмогая немощи и болезни твоя, благовременне и безвременне усердно сию посещал еси, назидая в вере, укрепляя в надежде и утверждая в любви. Сего ради вернии научишася воспевати тебе таковая:

Радуйся, Евангелия Царства Небеснаго проповедниче благогласный. Радуйся, винограда Христова делателю неутомимый. Радуйся, богомудрыми твоими словесы многи в разуме просвещаяй. Радуйся, благодати Апостольския наследниче, от адовых уз тайнодейственне нас свободяяй. Радуйся, архипастырю благосердый, любовь и кротостию своею вся покрываяй. Радуйся, Владыко прелюбимый, бедствующия защищаяй. Радуйся, милосердия неисчерпаемое сокровище. Радуйся, ищущим спасения готовый споспешниче. Радуйся, милостивый скорбящим помощниче. Радуйся, обилием любви твоея вся удививый и многия друзи себе стяжавый. Радуйся, пастве твоея пособниче благодарованный. Радуйся, яко тобою Имя Пресвятыя Троицы в Казахстанстей стране прославляется.

Радуйся, святе Николае, Христов исповедниче и Казахстанский чудотворче.

### **Кондак 6**

---

Проповедует богоспасаемый град Алма-Ата и богохранимый Казахстан ты, духоносе, пастыря добра, душу свою за наследие Христово положившаго и дарами чудодейственныя

благодати от Небеснаго Домовладыки прославленнаго, и научает верныя пети всех благих подателю Богу: Аллилуия.

### **Икос 6**

---

Возсия свет твоих добродетелей и Христоподражательныя любви твоея всем ищущим спасения вечнаго и путем скорбным и тернистым со упованием и непреклонною верою в силу Божию, в немощи человеческой совершающуюся, шествующим. Иже, благодаряще Бога, даровавшего им зрети в тебе благодать, юже апостол языков Павел исповеда, вопия: вся могу о укрепляющем мя Христе Иисусе, во умилении возглашают ти таковая:

Радуйся, тезоименному мученику Феодосию в твердом исповедании веры во всем житии твоём подражавый. Радуйся, Николаю Угоднику в простоте и кротости соревновавый. Радуйся, сего по Бозе и Богородице перваго заступника рода христианскаго быти почитавый. Радуйся, купно с ним Христоподражательным смирением и любовью победителем народа явивыйся. Радуйся, соименный храм его, посреде бури безбожнаго мятежа устоявший, во граде Алма-Ате благолепно обновивый. Радуйся, невесту

прекрасную, Варвару великомученицу, всеблаготворительно почитавый. Радуйся, у рацы цельбоносных мощей ея во время молитвы от внезапныя смерти избавленный. Радуйся, в похвалу и честь ея престол благодати во граде Алма-Ате воздвигнувый. Радуйся, древнюю икону ея Божиим изволением чудесно обретыи и в кафедральном храме поставивый. Радуйся, у нетленных мощей Святителя Иннокентия во граде Иркутске служа, твердости веры и ревности Божия научивыйся. Радуйся, добродетелей дивнаго чудотворца Черниговскаго Феодосия равночестное проявление. Радуйся, яко их же на земле в молитвах призывал еси, на небесех ныне в лице собеседников своих имеши.

Радуйся, святе Николае, Христов исповедниче и Казахстанский чудотворче.

### **Кондак 7**

Хотя человеколюбец Господь преудобренную токами крови новомучеников Российских Казахстанскую землю явити доброплодною нивою евангельского сеяния, дарова ты, блаженне, христоименитым людям страны сия в помощь, покров и защиту, да житию твоему

подражая, ученими твоими назидаемыми и благомошными молитвами твоими сохраняемыми в радости поют Богу: Аллилуия.

## **Икос 7**

---

Новаго тя гражданина Иерусалима Небеснаго познаша духовныя чада твоя, егда чистою и боголюбезною душею твоею возшел еси в небесныя кровы, идеже Всеблагая Вратарница, двери райския верным отверзающая, Пречистая Матерь Господа Небеси и земли ввела тя в светозарный круг друзей Христовых, за благоуханныя молитвы твоя непрестанно возносиши за почитающих любовь святую память твою и благодарне вопиющих:

Радуйся, час отшествия твоего к Богу предузнавый. Радуйся, прежде онаго радости Святыя Пасхи на земли духовне насытивыйся. Радуйся, явлением преподобных Антония и Феодосия Печерских пред кончиною твоею утешенный. Радуйся, во время молитвы дух твой в руце Божии предавый. Радуйся, нищетою духовною царство Божие стяжавый. Радуйся, кротости ради богоблаженную землю обетования унаследовавый. Радуйся, уничижением в кратковременном житии славу вечную

восприявый. Радуйся, яко исповеда Тя Христос пред Отцем Своим Небесным. Радуйся, яко и пред ангелы Своими Господь сил прославил тя. Радуйся, яко Честнейшую Херувимов и Славнейшую без сравнения Серафимов Деву Богородицу с лики сил небесных воспеваеши. Радуйся, на небеси присно торжествуяй. Радуйся, на земли преславно чудодействуяй.

Радуйся, святе Николае, Христов исповедниче и Казахстанский чудотворче.

### **Кондак 8**

---

Странное и преславное торжество явися в престольном граде Алма-Ате, егда многотрудное тело твое, к месту упокоения рукама иереевыма, яко по воздуху носимое, посреде безчисленного моря людскаго прощальное шествие совершаше, научая верных единокорно претворяти надгробное рыдание в хвалебную песнь Богу: Аллилуия.

### **Икос 8**

---

Весь исполнен быв любве Божественныя, явился еси Святаго Духа нерукотворенный храм, дарами благодати преукрашенный: душу бо твою за врученное ти стадо, полагая и всем

духовне во всем угождая, не своея, но ближняго пользы искал еси, да всяко некия спасеши. Не забуди ныне и нас, в добродетели убогих и твоего наставления ищущих, да зовем ти:

Радуйся, служителю Божий, гонения правды ради смиренно претерпевый. Радуйся, розго винограда Христова, мног плод в пособие православным творящая. Радуйся, благовестителю света Христова, омраченная очеса и сердца народа просвещаяй. Радуйся, провозвестнице Благодати, сумнящихся в вере словом Божиим утверждаяй. Радуйся, пастырю Богомудрый, православное юношество ко спасению наставляяй. Радуйся, молящихся тебе дарами Духа Святаго обогащаяй. Радуйся, молитвою твоею по воздуху плавающих от внезапных смерти сохраняяй. Радуйся, от губительных землетрясений избавляяй. Радуйся, града Алма-Аты славо и ограждение. Радуйся, всех градов и весей Казахстанских страже неусыпный и теплый хранителю. Радуйся, яко имя твое по всей стране нашей от конца в конец прославляется. Радуйся, яко чудесы твоими инославные к православию обращаются.

Радуйся, святе Николае, Христов исповедниче и Казахстанский чудотворче.

## Кондак 9

Весь еси, блаженне отче Николае, в вышних присно во обителях райских, в селениях праведников водворяеши, но и нас, паству твою, тебе тепле почитающую, не оставляеши, наставляя к разуму Божественному и деланию усердному заповедей Христовых и всякая благополезная прошения наша исполняеши, подвизая нас пети хвалебную песнь Богу: Аллилуия.

## Икос 9

Ветия многовещанныя превзошел еси духовною силою кротких вещаний твоих, святе, неустанно пастве твоей проповедуя Христа Распята и Воскресша, Ему же подражая, сию други своими величал еси, увещая всякому греху умирати, живым же во исполнении заповедей Божиих быти. Мы же, благоуветливый глас словес твоих благодарным сердцем объемлюще, вопием тебе таковая:

Радуйся, алтаря Господня непорочный служителю. Радуйся, благолепия церковного усердный рачителю. Радуйся, преданий апостольских верный хранителю. Радуйся,

добрых нравов и любви к Богу и ближним насадителю. Радуйся, селения Господня – храмы святые паче всех селений земных возлюбивый. Радуйся, Божественныя службы и Христова учения паче всех деяний взыскавый. Радуйся, послушанием и смирением врага рода человека победивый. Радуйся, агне незлобиве, никому же зла за зло воздававый. Радуйся, веры православныя благовестниче усерднейший. Радуйся, Церкви Христовы учителю изряднейший. Радуйся, звездо пресветлая, к Солнцу Правды Христу Иисусу всех путеводящая. Радуйся, свеще неугасимая, у престола Господа славы присно горящая и нас огнем любви Божия воспламеняющая.

Радуйся, святе Николае, Христов исповедниче и Казахстанский чудотворче.

### **Кондак 10**

Спасти хотя души человеческия, благое иго Христово и легкое бремя Его вседушевно на себе восприял еси, богоносе. В гонениях же многих верность и твердость в терпении проявил еси, да сам, искушен быв, сможеша искушаемым нам помощи, да и мы принесем Христу плод веры в добродетели, в добродетели же разум, в

разуме же воздержание, в воздержании же терпение, в терпении же благочестие, во благочестии же братолюбие, в братолюбии же любовь, и воспоем Ему: Аллилуия.

## **Икос 10**

---

Стена твердая и прибежище благоутишное всем с молитвою теплою и верою несомненною к заступлению твоему притекающим явился еси, ищущим спасения токи благодати Божия источая, от них же пролей и мне струю приснотекущую, яко да и аз со всеми воспую ти:

Радуйся, Бога истиннаго служителю. Радуйся, бесов прогонителю. Радуйся, ненадежных надеяние. Радуйся, отчаявающихся утверждение. Радуйся, даром прозрения наделенный. Радуйся, силою Божиею преславно чудодействуяй. Радуйся, немощей душевных и телесных целителю скоромилостивый. Радуйся, нераскаянных грешников из глубины погибели изымаяй. Радуйся, оставленных врачами на своя руце принимааяй. Радуйся, врачу безмездный туне врачевания всем подаваяй. Радуйся, в сонном видении иереев, в темнице страждущих, утешивый. Радуйся, добрыми

твоими делы вся ко прославлению Отца  
Небеснаго призываяй.

Радуйся, святе Николае, Христов  
исповедниче и Казахстанский чудотворче.

### **Кондак 11**

---

Пение благодарственное Пресвятей Троице  
все православные, на обширных Казахстанских  
просторах живущия, взывают, яко благоволи  
даровати нам тебе, святе, пастыря добра и  
молитвенника благомоцна, и притекающе к  
раце святей твоей, усердно просят: моли о нас  
Всеблагото Бога, да, яко Судия и Мздовоздаятель  
праведнейший, не отвратит лица Своего от нас  
недостойных, присно согрешающих и  
преогорчевающих благоутробие Его, но, яко  
Отец чадолюбивый накажет ны зде, во  
временем житии нашем, да, отвергше тленная  
и временная, обрящем нетленная и вечная, со  
всеми святыми поя Ему: Аллилуия.

### **Икос 11**

---

Светозарное светило, лучами христианских  
добродетелей сияющее, явился еси, небо  
церковное украшая, богомудре, и всем,  
блуждающим во тьме неверия, сомнения,

маловерия и нечестия луч надежды на спасение подавая и к Солнцу Правды Христу Иисусу путеводай, да во свете заповедей Его со всеми верными веселыми ногами шествуя, радостне тебе воспоют:

Радуйся, выну себе быти служителя Христова исповедоваый. Радуйся, исповеданием сим веселие Церкви Святей дароваый. Радуйся, в вертограде Господни от утра до вечера жизни твоя добре потрудивыйся. Радуйся, яко град, верху горы стояй, не могий укрытися. Радуйся, во многотруднем телеси велию силу духа явивый. Радуйся, крест богоугоднаго жития до конца в терпении понесый. Радуйся, в крестоношении твоём залог вечнаго блаженства восприяый. Радуйся, сего ради славу Триединаго Божества лицом к лицу на небеси узревый. Радуйся, благодатию Духа Святаго тело твое просветивый. Радуйся, тоюжде благодатию и по смерти нетленным его сохранивый. Радуйся, прославлением мощей твоих всех нас радости духовныя преисполниый. Радуйся, нетлением мощей твоих зарю общаго воскресения нам показавый.

Радуйся, святе Николае, Христов исповедниче и Казахстанский чудотворче.

## Кондак 12

---

Благодатию Божию в непрестанном творении заповедей Христовых обогативыйся, по отшествии твоём от земных наипаче к трисолнечному престолу Троицы Пресвятыя приближивыйся, но и от паствы твояе духом любви не отступивый, и во вся концы Казахстанския страны животочная токи благодати Божия источаеши, вдыхая в сердца верных хвалебную песнь: Аллилуия.

## Икос 12

---

Поем твердую веру и несокрушимое терпение твое, величаем равноапостольныя труды благовестия твоего, ублажаем блаженную кончину твою, славим сострадание и скорое заступление и помощь твою, чтим святую память твою и воспеем ти похвальная сия:

Радуйся, благочестия святоотеческаго изящный подражателю. Радуйся, веры православныя дивное украшение. Радуйся, яко Иов многострадальный, всего себе воле Божией предавый. Радуйся, яко праотец Авраам, несумнену веру во всех испытаниях показавый. Радуйся, яко Даниил, муж желаний,

премудрость Божию разумети вожделевый. Радуйся, яко Илия фесвитянин, молитвою теплою дождь от зноя страждующим низведый. Радуйся, яко Елисей, сугубую благодать от Бога восприявый. Радуйся, яко боговидец Моисей, чистым сердцем Бога зревый. Радуйся, яко богоглаголивый Исаия, тайны Божия верным возвестивый. Радуйся, Давидово покаяние явивый и проповедовавый. Радуйся, имже человеколюбец Христос прославися. Радуйся, имже зловредный велиар посрамися.

Радуйся, святе Николае, Христов исповедниче и Казахстанский чудотворче.

### **Кондак 13**

О, пастырю наш предобрый, кротостию и смирением в сети любви Божия души людския уловляй, прими малое сие благодарение, в похвалу тебе приносимое, и непрестани присно ходатайствовати о нас пред Отцем нашим Небесным, да, избывше в житии сем хитросплетенных сетей вражиих и прелести бесовския, воздушных мытарств князя злобы и вечныя геенны огненныя избавимся и сподобимся в небесных селениях с тобою и всеми святыми пети Богу: Аллилуия.

(Этот кондак читается трижды, затем икос 1 и кондак 1)

### **Молитва**

О предивный Человеколюбца Господа и Спаса нашего Сладчайшаго Христа Иисуса подражателю и стада словесных овец, от Него попечению твоему врученнаго, добрый пастырю! Ты в житии твоём многообразныя козни лукавых человек и духов тьмы испытал еси и благодатию Божиею, от матерних пелен тобою усердно в чистоте хранимою, явно тех победил еси. И нас, в добродетели убогих, сетей бесовских избави, да всегда во всем житии нашем делом, словом, умом и помыслы сердец наших, верно и непорочно послужим Единому Своему Владыце и Богу, яко и обещалися есмы при купели своего крещения Тому благоугождати. Ты паче всех земных благ Сладчайшаго Господа возлюбил еси и Тому чрез все житие добре последовал еси, угодникам Его всеусердно подражая, Божественными учении и благодатию не свою токмо душу питаючи, но и множество людей от тьмы неверия и лжеименнаго разума к Несозданному свету Единосущныя Троицы привел еси. Сия добре

ведуще, молим тя, испроси у Христа Бога благодать просвещающую и освещающую нас, да ею осеняеми, в вере и благочестии, в подвизех любви и самоотвержения проживем и неленостно потщимся служить ближним в их нуждах и обстояниях, да предстательством твоим сподобимся непреткновенно кратковременное странствие жития нашего совершити и в мире и покаянии града вечныя радости Иерусалима Небеснаго достигнути и тамо, с тобою и всеми святыми, непрестанно воспевати Троицу Нераздельную, Единое Божество, Отца и Сына и Духа Всесвятаго, во веки веков. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

†

НОВОЕ  
НЕБО